



UKA 2018/204
10. oktober 2018
Aqqaluk Heilmann

Uunga siunnersuut: Eqqissimatitsisarneq aamma allatigut kulturikkut eriagisassanik kulturikkut kingornussatut illersuineq pillugu Inatsisartut inatsisaannik allanngortitsineq pillugu Inatsisartut inatsisaat nr. xx, xx. xxx 2018-imeersoq

(Ilinniartitaanermut, Kultureqarnermut, Ilageeqarnermut Nunanullu Allanut Naalakkersuisoq)

Atassummiit oqaatigissavarput Naalakkersuisumit siunnersuutigineqartoq tamakkiisumik tapersorsoratsigu, nunami eriagisassatut inissisimasut soorlu ilerriit aammalu illuutitoqqat kulturitsinnullu tunngassuteqartut eriagisassatut nalilerneqarsimasut allanngutsaaliinikkut inatsisitigut atuutsitsinikkut nakkutigineqartariaqarmata.

Takuneqarsinnaasutullu siunnersuummi ilanngullugu isumaliutersuutaavoq Kalaallit Nunaata avannaarsuani kangianilu Nuna Allanngutsaaliugassatut Immikkoortitaq pillugu Namminersornerullutik Oqartussat nalunaarutaat nutarterneqassasoq.

Tamatumunngalu atatillugu uaguttaa Atassummiit pissusissamisoortutut isigivarput nunami allanngutsaaliukkami Kalaallit Nunaata Avannaarsuani kangianilu malittarisassat sakkortusisat erseqqissaavigineqarnissaat.

Taamatullu eriagisassatut nalilersuisarnermi allanngutsaaliuinerup nassataanik eqqarsaatigineqarsinnaasutut ilassutigerusupparput imartatta uumassusilinnit najugaqarfii ingerlaarfissuilu aamma nalilersorsinnaasariaqaratsigit piujuaannartitsinissamut kaputartuutinngikkaluarlugu, kisiannili pinngortitamik nakkutigineqanngitsutut mingutsitsisinnaaneq pinaveersimatittariaqaratsigu.

Soorlu aasat tamaasa tingerlaataannallit sineriatta kangerlui putoqquartaartarpaat uumasut ingerlaarfii eqaloqarfiit uumasuteqarfignullu kissaviarsoqarfiit tamaasa aqquarneqartarlutik, aammalu qilalukkat ingerlaarfissui umiarsuarnit takornariartaatinit aqqutarineqartuutuusarlutik.

Naatsumik oqaatigalugu, imartatsinni nunamiittullu uumassusillit najugaqarfii allanngutsaaliorneqarnerat nakkutigineqarsinnaanera isuma eqqartorneqarsinnaasariaqarpoq asimi imartatsinnilu angallattunit uumassusillit najungaqarfii ilanngullugit allanngutsaaliortariaqaratsigit, tassa eqqissimatitsineq uumasunik.

Naalakkersuisup siunnersuutaa taama oqaaseqarluta Atassummiit ataatsimiititaliamut susassaartumut ingerlateqqinneqarnissaa innersuupparput.